

## **O CONSELLO DA XUNTA DÁ LUZ VERDE AO DECRETO POLO QUE GALICIA CONTINUARÁ A SER A COMUNIDADE COS PREZOS DE MATRÍCULA UNIVERSITARIA MÁIS BAIXOS DE ESPAÑA**

- *Deste xeito as familias galegas con fillos na universidade aforrarán 25 millóns anuais*

O Consello da Xunta deu hoxe luz verde ao decreto polo que se fixan os prezos correspondentes aos estudos conducentes á obtención de títulos universitarios de carácter oficial e validez en todo o territorio nacional no ensino universitario para o curso 2016/17, o que permite que, un ano máis, Galicia volva ter os prezos de matrícula na universidade máis baixos de toda España. Neste sentido cómpre lembrar que, segundo o informe analizado no Consello no mes de abril sobre este asunto, se a nosa comunidade tivera as taxas universitarias iguais á media de España, as familias galegas con fillos ou fillas na Universidade desembolsarían anualmente 25 millóns de euros adicionais no pagamento destes estudos, polo que a decisión de conxelalas por cuarto ano consecutivo supón un importante aforro para as economías familiares.

Cómpre salientar, ademais, que todos os membros do Consello Galego de Universidades votaron de forma unánime a favor da conxelación dos prezos públicos no último pleno deste organismo, celebrado o pasado 8 de xuño.

Con esta proposta, a Xunta ratifica a súa decisión de manter os prezos públicos nos niveis dos cursos anteriores, de xeito que o Sistema universitario de Galicia continúe a ser o máis accesible de toda España para o estudantado. Reforza, por tanto, o seu compromiso coa igualdade de oportunidades no acceso aos estudos universitarios, como vén facendo desde o ano 2009.

### **Prezos medios**

No caso dos graos universitarios, o prezo medio das primeiras matrículas de grao (que representan preto dun 83% do total) mantense en 11,89 euros/crédito, o máis baixo de España, fronte aos 33,52 euros de media de Cataluña.

Tamén no caso dos máster os prezos son os máis baixos, cunha media de 26,49 euros, fronte aos 65,87 euros/crédito de Cataluña, e de 12,63 euros por debaixo da media estatal.

Cómpre lembrar que Galicia é comunidade líder na defensa duns prezos públicos axustados que permitan que ninguén quede fóra da Universidade por motivos extra académicos. Para iso, o Consello Galego de Universidades emitiu informe favorable a suba mínima permitida dos prezos públicos (o IPC) nos cursos 2009/10, 2010/11 e 2011/2012. A partir do cambio de sistema para a actualización dos prezos, o curso

2012/13 decidiuse conxelar os prezos públicos da primeira matrícula de grao e aprobar a suba mínima posible para os de sucesivas matrículas. Para os cursos 2013/14, 2014/15 e 2015/16 optouse pola conxelación, da mesma forma que se propón agora para o curso 2016/17. Para os cursos 2013/14, 2014/15 e 2015/16 optouse pola conxelación, da mesma forma que se fai agora para o curso 2016/17.